

# ZION THUSUAK

REVIVAL CHURCH



OF GOD (RCG)

Vol. XXV

January - February 2021

No. 125



**THUPI:**

**“.....La lungthim uh chu siamthak ah  
um in, hung danglam ta un”**

**Rom 12:2**

**Editor: Rev. Dr. Khupkam Vaiphei**

# **ZION THUSUAK**

**EDITOR:**

Rev. Dr. Khupkam Vaiphei

**Associate Editors:**

1. Rev. Liante
2. Rev. Ngulneipau

**Contributing Editors:**

1. Mr. Kh. Sang Vaiphei
2. Rev. Kailum

**Advisor:**

Rev. Kamlam

**Board Members:**

1. Upa Mangkam
2. Upa Tinthang

**ASUNG AH THUTE****Page**

- |   |    |
|---|----|
| 1. Editorial  | 01 |
| 2. Thagau ah kisiamthakna<br>tak tak a pawimaw hi                   | 03 |
| 3. RCG Kum 50 tinna Golden<br>Jubilee 1970 – 2020 kimatna<br>report | 07 |
| 4. Kumthak Ginna Thucha   | 13 |
| 5. Muanna leh bitna a um hi   | 16 |
| 6. Diktatna Phatchuam dan   | 18 |
| 7. Pauchapna hetding te   | 22 |
| 8. Hiatsakna  | 23 |
| 9. Patron member leh Agent List                                     | 24 |

---

**Address:****ZION THUSUAK**

**RCG Head Office, Hilltown, P.O. Box – 91,  
Churachandpur 795128 , Manipur, India**

*Editorial...* ✍

Christmas leh Kumlui 2020 thâkna leh Kumthak 2021 lawpna hun te chu kochuam tin in buaina bangma umlo in kipak tak in program kisiam te chu i mang zo tau in, ziagual ah hunpha leh damna ei pia tu Pa Pathian chu amasan pak in um ta hen.



Mizosian kumlui 2020 kumkha kum phalo, kum sia ti in agen ua, lamkhat in chu adik hi, himaleh, vak gel tiam u, insung kituaklo te kituakna apianga, insung maicham siam kha loten ahun siam pan thei ua, Biakin kikhawm khalo ten Biakin kikhawp ding bang ahun ngainau ah, Pathian lam thu ah kimang dingah hung kipan thak bang a um dawk thei in, hiti chun piangthak loten le pianthakna hun nei thei in ala um thei ziakin kum phalo, kum sia vak mawk ti ziangthei in ka gel thei puan, maleh kumpha tidi chule unau khenkhat te a dinga a insung mi kilawm tak ah vuithei lo en theilo bang ala um kit in, chuleh, thidingah kilawm loten le thina ala chang kit un, amau insung mite dingin vang kumphalo ti inle genthei chu ahi kit hi. Ahin, a bang hun leh kum hita ziang lele bangkim hi Lalpa lei leh van siampa Pathian hat chungnung pa apat hung kipan ngen ahi ziak in lungkim ah puakdan thiam zaw ah maban kum inle umthei zaw dingin kisingsak na nei zaw taitiu. Bangkim lalpa ah kipat ngen ahi.

Kumthak melmu ihinau apat Lalpa a dingin bang gual in pan lak zawk ah, zia lei taksa hin thina ahun tuak ding hita ziang le le lung awlmaw na nei lo ah Lalpa taw kimel mu hun ah kipakna ilanci zawk thei na ding un, lunggel thak in haksatna bangkim

thuak zo ah malam naw zel thei ding in lalpa'n hun umpi in hun  
hihat zing ta hen. Amen.

-----

## THAGAU AH KISIAMTHAKNA TAK TAK APAWI MAW HI

*By: Rev. Dr. Khupkam Vaiphei  
Executive Secretary RCG*

**Tita 3:5.** I nasepteu hi thil feltakte ahi ziak hiloin, himaleh, siamthak sil thianna leh Thagau Thiangtho ah siam thakna ah chun a zangai na dungzuiin ei hukhingtai:

**2 Korinth 5:17.** Khua le Khrista ah a um chun, thil siamthak ahung hita: thil luite chu a beita' ngaitia, thil zosia chu ahung thak tai.

Kumsin ah ka la gen nuam pen chu, kum ahung thak ziak a kisiam thak, kum ahung lui leh ama le lui kit ziang sek te chanchin ahi deu hi, a ziak chu, ka etvel sek le mitin in agen bailam pen chu, kumthak i mu thei tak ziakun ikipak un, kum hung thak dungjuin in kisiamthak ding hitana tite hi ahi deu pen hi. Ahi kumthak imu chngun vang ikipak u chu adik puai katina hilo in, ikipak ding him uh ahi, ama bo, kum thak hungmu aki hi tak zia kin eile kisiam thak ding hitana ti te zosia haw ka etvel sek le, kum ahung lui tak zia kin ama leh ahung lui kit ta sek in ahi. ziak a chun kuale Khrista ah a um lo chun athak in kigel ma leu le athak tak tak ngailo ahi. Thagau Thiangtho ah siamthakna lo ngal kuama athak tak tak ngai puau in, danglam na le anei nghai lo u ahi. Nang Pianthakdan bang gual ahi em? Gentheina la tuak ziaka Piangthak la hi em? Vangpha leh lawting lakisak ziaka Piangthak la hi em? Zudawn, Lekha kap, Gukchak leh khamthei dang dang bawl hi thilpha ahi puai, inchen haksatna ding abo hitia piangthak la hi em? Kigel thak tiam in suapi, Khrista hepina

muchian ah ama a dingah la hinna phal khawp ah Ama taksanna nei ah Kalvari Khross ah tatna ei siam piak pawmna tak tak nei ah, bang gual haksatna, kipakna, buaina leh thupha thuphalo dawng ta ziang le le ka Lalpa hepina apat eikhen zopuana tia Pual in agen gual ah gen ziangthei khawp kidanglamna lanei lo chun, khawvel thil ah ten piangthak la hi chun, sawt lo ding ahi ti ka gen nuam ahi. mihiam khat hina in a chang le bawl khial, sep khial, sualna vabawl pangpal khathei, a ziak chu setan in ei chang zing ei entha zing ahi tho ziak in, Khrista Hepina tak tak lanei lo ahi chun buaipai ziangthei la hi. Ziak a chun zia Pathian hepina chu chang dingin kigel phan kati ahi. hepina akiti phat le, mawk geltam mai mai kin aw, Bible isim chun hepina hi thil piak lak lak a sangpen, hepina lo ngal in kuam gitlona ngaidam zolo ahi, hepina lanei lo chun sual bawl dawk ziang ding lahi, hepina hin sual tampi aliakhu zo ahi, Lungnatna le aliakhu zo ahi. la mi muda, la lungnatna na ma ma te khu hepina mit in vak enle chun agitlona, leh lamudana beimai ding ahi, Pathian hepina chang thei ding in ki ngai tua in aw.

**February 2007 issue:** Kisiamthakna leh Pianthak na thu hi akigen popo le hiatsa leh neisa dan in aki kawu ta sek in, ahina taka umtheila ki um ngai lo, umding gua le umlo in ei kawu ta sek hi. A ziak chu zia siamthak na leh Pianthak na tak tak ah um ding chu melma pa setan dawilo lam tak ahi ziak in, ziak a chun Pual in “alungthim mit uh zia khawvel pathian in a sukthum piak ala hia” tin ala gen in ahi. (2 Kor 4:3-4).

Neilo kinei sak, helo kihisak iti teu hi ahi sek uh eive buaina, haksatna tuak sek te hi, a ziak chu neilo pi ah a nei gual gual in thu agenthei sek un, ama bo septak tak ding, thaw dawk tak tak

ding akiti phat le aneilo hina pi chu a buai ngal sek tau ahi, chuleh, helo hi na na chu min hechian leh thiam dingin agel gual un dawtna leh ngansiana ahun nei phat tak uale abuai ta sek tei tei uh ahi. Ziagual ma chun Thagau lam thu dawl ah Pathian thu inle, n Pathian Thagau nei tak tak lo pi ah anei gual a um, Pianthakna neilo pi, Piangthak gual ah um, danglam na neilopi danglam na nei te gualah thugen kiti hi ilak un atam ma ma ziang tân, ziak a chun amau haw ziak in eive i kochuam ahung buai sekna, chuleh, haksatna ihung tuak sekna hawhi. Bangziakin? A ziak chu amau abuai tâk ziakun midangte le ahi buai phâk uh ahi. Malai a chun ei thingtang dan in tangval te chu Nungak haw inn in sawm a giak sek un a sawm giaknau in sawm khat (Tangval khat) in Jun a che khakle a lengua sawm Junche akiti sek un ahi, zia gual a chun kochuam te lak inle a diak in member te lak ah Nu khat, Pa khat in Pianthakna tak tak, danglam na tak tak ama ah chun a umlo chun, kochuam te ahi buai sek in, kochuam te dingin haksatna a siam sek ahi. ziagual ah kochuam te a dingah haksatna siamtu leh sugentheï tu te hi Jesu'n ama segentheï te ahiu ti in alagen ahi. (Nasepte 9:5) Pual in Christiane taksa in asuk gentheï leh a engbawl gual in vang la bawl lo maitheï, maleh, ki ngaitua in Thagau lam kochuam te chialai lampi ah hepina bei kei ah vaihawm na leh lunggel nasep la nei khak chun, lami te limtheï puan tiu in, kipak le kipak theï puanau, chun, zia maw chu nangma chungin tung ding ahi. chuleh, nang ngei le kipak in limtheï diak puanla, ama bo thangtawm man ah limleh kipak gual in kisiam ma le chun le hun chawm khat le hi diaklo ding ahi. zia chu ahi Jesu'n na asak pen chu.

A chungah igen gual mi hi ding hi kuaman le adawilo ahia, chuleh, nang inle nang ding mun dia dawi puan la tin, anei te le

pha salo ding la hi. Ahinla, bang ziaka nang ala nei khasek la hi em? A ziak chu Thagau ah siamthak na leh Pianthakna tak tak la nei lo zia kin ahi. Pianthakna tak, Thagau Thiangtho chang tak tak ten Jesu'n na asak ding in kochuam buaina ding leh natna ding bangma angaitua ngai lo uh ahi. kochuam buaina leh kikhenna tunsaktu chu setan ahi sek zia kin. Ki ngaitua inlang, Pathian Thagau ah Pianthakna leh Thagau changtu, neitu lahi nak a hi chun, adiklo ding leh aphalo ding hekhen thei in la tin, lamdik in kochuam te taw kithukawp thei ding lahi. Zia hun tak chule la Thagau le kipak thei tana. Nangma a ding bep gel lo in, midang a ding le gel piak sek zaw thei tanla. *“La chungah min hi ding in la dawisak gual in nang inle michungin hi in”* ti ahi. (Luka 6:31) Lalpa'n athu kigen te hi hethiam thei ding in hun malsawm ta hen, Amen.

-----



## **RCG KUM 50 TINNA GOLDEN JUBILEE 1970 – 2020 KIMATNA REPORT**

*By: Rev.Dr.Khupkam Vaiphei  
Executive Secretary RCG*

RCG Kum 50 tinna Golden Jubilee chu Covid-19 ziakin ahun tak in ala kimang thei ta lo maleh Lalpa Pathian mapuina zal in achiata tarik 28<sup>th</sup>-29<sup>th</sup> / November/2020 hun sungin Jubilee munpi T.Munjang vangkhua in kipak leh thanuam tak pum in lawting tak in matzaw ahitan ahi.

### **Program kimatdan tangpi te:**

Date: 28<sup>th</sup>-Nov-2020 tunkimni in nitak lam dak 3;40pm in Rev. Ngulneipau Moderator RCG in RCG Assembly flag khai dawna nei in Jubilee program chu mat pat alahin ahi.

Date: 29<sup>th</sup>-Nov-2020 Pathianni, Nipi ni zinglam dak 9:00am vel in Jubilee suang mun ah Upa Songlianhang in ma pui in, Rev.Ngulneipau Moderator RCG in Hun patna pauchapna anei zaw in Upa Soineipau in Pengkul mut in, a zaw ah, Golden Jubilee suang hawna Rev.Liante Ex-Moderator in anei ah, Rev.Dr.Khupkam Vaiphei in Jubilee suang lat thianna a nei zaw in, Jubilee choir ten Jubilee lapi asak zawu in Pengkul mutna um kit zaw in Upa lalcha vice Moderator in hun khakna pauchapna nei in suangdawna mun hun chu suktawp ahitai. Zia zaw ahin mipin Annek khawmna akinei in maban ding chu Hall program hung hita ding ahi.

Hun mangte leh thugente detail in kigen le chu tamta lua ding ahi tak ziakin, taklat ding kilawm umte kimlo ding hita maleh hun taklang zaw ingka.

Revival Church of God (RCG) kum 50 (Samnga) tin kum ahung tun taw kitawn in, Teldaw ah um Upa te, Pastor te, Department lamkaite leh mission founder te laka member khenkhat te taw kigawm ah mi 50 ten Dâkpi khetna ahun nei un zia hun sung ah chun Upa Songlianthat in RCG Chanchin te sûtna leh genlatna le ahun nei khawm ngal in ahi. Chun aban in, RCG Pawlpi sungah kua hile, Dan pawlam ah umte, Nawsua ah um te zosia Ngaidamna leh Saltangte Zalen na thucha Rev. Ngulneipau Moderator RCG in mipi te leh Pathian ma in puandawna ahun nei in Zalenna dak chu agitan ahi, Lopina Lalpa ah hita hen. Amen.

Chun, RCG Kum 50 tinna Golden Jubilee lawmding aki hi tak ziakin, RCG hung kiphu dawk til lai ah Committee member masa 12 (sawmpani) te kiangin, kipakna thilpiak in Memento khat chiat piak ahi, amau lak in atam zawn eibei san tau in, maleh a insung mite chial ala hia, adam te taw adam lote anuai ah gual ahin piak na chu nei hi.

1. (L) Upa Neihau 1<sup>st</sup> Chairman, ama sika Pu Ginzakhup achapa ti himaleh damlona ziakin hungthei lo in, a chanu Nk Linda of IB road in zia thilpiak chu kipak takin ei hung san piakin, chuleh Jubilee ding fund ala kidawl lai in ama Pu Ginzakhup inle Rs,5000/- Jubilee kithuapina dingin ala thaw dawk in, kipak a um ma ma hi. Lalpa'n ama leh a insung mite ale tamtak in hun malsawm ta hen.

2. (L) Dr.Damzakhai 1s Secretary, ama sikin a chapa Pu Thangliankhup of Hilltown chial ala hia, ama ngei le kipak tak in ei hung panpiak in, kipak takin thilpiak te ei hung sang piak in, chuleh ziani hin, Jubilee kithuapina in Rs, 5000 le ahun thaw dawk in kipak a um hi. Ama Pu Thangliankhup leh a insung mite Lalpa'n ale tam tak in hun malsawm ta hen.
3. (L) Pu Sawikhawmang 1<sup>st</sup> Treasurer, ama sikin alawinu Pi Vahkho of Kangvai chial ala hia, ama ngei le ei hung panpiak thei in, kipak umtak in thilpiak te le ei hun san piakin kipak a um ma ma hi.
4. (L) Pastor Soikhothang member, ama sikin a chapa Upa Henneikam of Torbung chial ala hia, ama ngei le hung pang in kipak takin thilpiak te ei hun san piakin kipak a um hi. Chuleh ziani hin ama Upa Henneikam inle RCG chung a kipak etsakna in Register bu Bu 4 (Buli) ahun pian kipak a um hi.
5. (L) Pu Lamzakhup member, ama sikin amo nu Biaki of Hilltown chial ala hia, himaleh ahung thei ta puau hi. Thilpiak vang ava kithak piak ahi.
6. (L) Pu Ginzapau member, ama sikin alawinu Pi Zokim chial ahia, ama ngei le hung pang in kipak tak in thilpiak te ei hung san piak in kipak a um hi.
7. (L) Upa Lamkhopau member, ama sikin a chapa Pu Pautinkam of Sumtuk chial ala hia, maleh ama le hung thei ta lo in a um in, thilpiak vang kitunsak ahi.
8. (L) Upa Kaihau member, ama sikin a chapa Pu Paulunthang IAS chial ahia, maleh ama le abuai ziakin hungpang thei lo in a um ah, maleh thilpiak vang tunsak ahi.

9. (L) Pastor Khupkhonek member, ama sikin a chapa Pu Paukhai of Phovaibi chial ala hia, maleh ahung thei lo ziakin Upa Manglun in thilpiak asang in kipak a um hi, chuleh ama Pu Paukhai inle Jubilee fund ding aki hawl lai in Rs, 1000/- in Jubilee kithuapi na ala pian kipak a um hi. Lalpa'n ama le a insung mite ale tamtak in hun malsawm ta hen.
10. Rev.P.Kamlam member of Imphal hiatingna leh kipakna thilpiak te kisan ding in chial ala hia, maleh ama le taksa hatlona ziakin ahung thei ta pua, ama sikin atunu Nk Martina'n of Imphal in thilpiak te ei hung san piak in kipak a um hi, ama Rev. P.Kamlam inle Jubilee fund akidawl khawm lai in Rs, 7000/- ala thaw daw in kipak a um hi, lalpa'n ama leh a insung mite ale tamtak in hun malsawm ta hen.
11. Upa Kaihen member of T.Munjang Hiatingna leh kipakna thilpiak te kisan ding in chial ala hia, maleh ama le taksa hatlona ziakin ahung thei ta pua, maleh, ama thakhel in achapa P.Mamang in kipak thilpiak te ahungsang in kipak a um hi, ama Upa Kaihen in Jubilee a ding ah fund ala kihawl lai in Jubilee kithuapi na dingin Rs, 3000/- ala thaw daw in kipak a um hi, ama leh a insung mite Lalpa'n ale tamtak in hun malsawm ta hen.
12. (L) Pi Damcha member, ama hi akihawl lai in, athakhel thei ding tiang insung mi hawl daw in a um thei tak lo ziakin piak thei in a um ta puan kipak thilpiak ding piak in a umthei ta lo ahi.

**Souvenir Bu hawna leh latna:** Rev. Kailum Vaiphei Ex-Moderator RCG in RCG Golden Jubilee Souvenir bu hawna leh latna ahun nei in, a zaw in Rev.Liante Editor Souvenir in

Souvenir bu genlatna ahun nei in, azaw in, RCG Mission sungah kipakna thilpiak piak dingah kilawm te aban ban in piak daw na le anuai a gual ahin nei ahi.

**1. Sawm ah khat piatam pen te a thumna tiangin. 2019**

- A) Pi Ngaikim Chief of T.Munjang
- B) Pa LB Japhet
- C) Upa Songlianhang

**2. Khut ah Bible zikzo te**

- A) Nu Sangi w/o Rev. Liante of Kangvai
- B) Nu Samboi w/o Pa Thanga chief of Vanghoiphai
- C) Nu Lily w/o Upa Khuallawm of T. Munjang
- D) Nk. Florence d/o Pa Mangcha Chief of Gawtangkot

**3. RCG Pawlpi sungah kipakna chungchuangah piak ah um**

A) Vanghoiphai kochuam amau hin Mission dan gual ah HQ submit ding dawl te bangkim 100 lak 100% bukim tak in ahun sepdaw thei ziakun kipakna leh chawihawi na piak ahi.

**4. Golden Jubilee Lapi hun siamtu pakchatna**

Pa Khamchunglam of Kangvai in RCG Golden Jubilee Lapi ahun siam daw ziakin, a chungin Mission te kipak ma ma in, kipakna suklatna in Hiatingna thilpiak piakna le nei ahi.

Editor Souvenir bu Rev. Liante apat in le Souvenir bu ah Greeting message zikte le article zikte zosia chungah kipakna suklatna in Souvenir bu khat khat in hawpdawna le nei ahi.

Golden Jubilee hun hi Sun khat leh Zân ni bep hun ahi ziak in, Pathian thuhing genna le Nivei bep a um in ahi, Thugentute ahile, Upa Th.Lalcha Vice Moderator leh Rev.Dr.Khupkam Vaiphei ten Thugenna hun anei un, hun tawp zan in Nu Ngaikim

Chief of T. Munjang in kipak thu gen in, a zaw ah RCG Assembly te puanlap (Flag) khaihakna Upa Th.Lalcha vice-Moderator in anei zaw in RCGG Golden Jubilee chu khela tak leh it umtak in program chu matzaw ahitai. Lalpa'n RCG pawlpi te hi Diamond Jubilee lawmkit thei ngei ding in dam chiat in imau eipui zing ta hen. Amen.

**Golden Jubilee kimatna limlak khenkhat atawplam in takdaw ahi.**

-----

## KUMTHAK GINNA THUCHA

*Upa Songlianhang Vaiphei  
Imphal*

2020 kum buai um mang zo ah hun thak leh kum thak 2021 galkai thei ding ah ei mapuitu, lopina ka hun piyai, aw Lalpa Hatchungnung Pathian.

Mi zosia kinepna 'kumthak phat le chu zia gual hin bawl ka, zia gual hin sem ka', ti lunggel nei hi atam zaw hi ding in ginchak ahi. Lekha sim ten le aban chon ding ti chu a umsa ahi. Ahinla, naupang lekha sim zing lai te kum 2/3 sung ale maban hung chon zo talo, asim ngaima simzel ding a um chun nu leh pa kipâkna ei puai. Lekha sim zosiate hi graduation tiang a zaw na ding uahin atangpi in kum 20 tiang sung hi um leh umlo leh chomkhawm in nu leh pa te hin pan ilak zing uh ahi, kinepna liantak nei pum in.

Kumthak 2021 I zawt pat zinglai uhin, khawvel ah Pathian thilsiam, etsakna- nisuak leh tum hun leh adang dang bangma akisang, azat chuamna um diaklo ahi. Kumthak hin bang ma athak hung pualut zing ziang lo ahi. Hun thak leh thil thak muna ding ahin nangma ngei thil siamthak la hi ngai ahi. Eima ah thakna apat chun thil zosiate thak leh a danglam ah muthei bep ahi.

Kumthak I zawt pat zinglai u hin, khawvel taksa nek leh chak chuleh inchen lochen inle panthak lak dan ding guanggalna inei thei ua leh, bang atia I ginna lam ua le pan thak lak ding dan

ngaitua khalo tamtak umsek ihu em? kum tamtak nang haw sang ah Khristian ala hi ka hi tai, kum tamtak lawiupa dinmun ala pang ka hi, ti haw hi eima Khristian lawiupa khenkhat ngaidân leh kampau inle ala pawt sek hi. Tamtak kala sem tai, ahun tai, ti ah kiheisan thei Pathian hilo ahi. Pathian nasep sepkhol ah cholsan thei hilo ahi. Hebrai 3:14 na a til ah kipat I ginnau kingakna kha a tawp tiang ah I tukdet ua chun, Khrista kikoppi te chu ihi tau hi. kum 10/20 masang lai I dinmun kha tuni chan ah bangma machalna neilo tampi I um thei hi.

Kumthak I zawt pat zing lai un, eima dinmun kha sangtak ah kikawi (min chu ei kawi lo) ei ma ah Pathian Thagau um leh piangthak ah kum sotpi ala um ta ahi nung ale I insak – inthang te kiang ah Pathian Thagau ga – Hepina, Kipakna, chamna, dawtheina, nunnemna, Phatna, Ginumna, Thunuaigolna leh kismtheina eima apat suklatna nei khalo leh mite'n eima apat semdok theilo (piangthak ahi diam?) chun, 2.korinth 3:2 a chun 'nangmau chu ka lekha chu la hui, ka lunggil sung ua kizik, mi zosia het leh sim chu la hui hi,' ti ahi ngal a.

Kumthak I zawt pat zing lai un, damlai chomcha hinkhua siamna a bawn kum 20 tuam thiamzilna le nuai bangjat ahem kisen (mangzo) khok salo ihu. Kompetision lawtinna ding ah bangzat sum lut leh le gold medal muna ding ah kum bangzat kizil ding – lawtinna a um chun kigun (kituak) isa tho sek ui. Chomcha vak bol ziak mai ah, vak thawdok ziak mai ah piangthak hiziang ding chu zia gual mai ah kumtuang hinna mu leh chan ziang thei hilo ahi. Hun chomcha hinkhua siamna khel in thupizaw ngei ding ahi.



Kumthak I zawt pat zing lai un, tulai gingtu tamtak hi – SundayKhristian biak inn sungmai Khristian atam ah, chun tulai Khristian khenkhat ngaidân –thawlawm tamdeu, sawmahkhat tamdeu, kikhom mundeu, Khristian hisa eima pawlpi puilut tamdeu leh a dang dang bawlfu thim te haw hi piangthak dinmun dan ah um ziang kitam ahi. Ahinla, pathian a ding in vang a buting a poimaw hi. chun kumtuang hinna hi chu zia gual lawm ah mantawm leh bailam ah mu ziang thei hilo ahi.

Lalpa'n zia thugualte apat hin simtu zosia hetthiamna peta hen.  
Amen.

-----

## "MUANNA LEH BITNA A UM HI..... SUAKCHA PUANAU" (1.Thess. 5:3)

*By: Rev. Kailum Vaiphei  
Kangvai*

Zia Bible chang hi, Lalpa Jesu hung kitna ding ah ki ging zing ah um a kuldán Pauli'n Thessalonika Kochuamte kiang ah a lekthawt 1 veina ala gen chu ahi. Muanna (peace) leh bitna (safety) bang ahem? ti ngaitua masak a ngai hi. Muanna leh bitna hi mihiamten lungmuanna leh bitna ding tiang lungthim nei in ti un, thildang bangma buaina hung tung puanna a ti laitak un, manthaina a chung un hung tung ding ahi, a tina ahi. Pathian thutep Sodomte chung ah, a khawpiu kangtum ding ahi, tichu a gingcha puau ah, lamdiklo haw chu a haisan nuam diak puau hi. Kangtum ding ahi ti thu kha gingcha leu chu a gitlonau haisan in, Pathian chu bel ding ahiu in, hilehle, Pathian thutep chu ahe ngal un, a ngaisak diak puau hi. Zia chu muanna leh bitna hun ahi ti a ngaitua ziaak un ahi. Ahinlah, Pathian thutep chu a chung un a tung tho tho hi. Zia hun akhan a chung un van lam apat meipi a hung zuk thak kha heman ma ma ding ahiu, hilehle, zia hun akhan kisik ma ma leu le amau a ding ah kha, ngaidamna hun a um thei tapuai, lungmuang leh bit ah a kingai ziaak un ahi.

Zia gualmachun, tulai khawvel ah mihiam umte hinle, muang leh bit kisan Pathian awi hilehle, gukchak lakchak, khamthei, thanhuai, soal bawl khawk salo/haisan nuamlote a ding ah a zik ahi. Tulai khawvel ah thil tung, natna hi leng Covid - 19 ah hin mi 1.9 million thita, a hung bei ta diam iti leh Covid - 19 sang ah 56% ah hatzaw Covid Strain U.K. Gam in ahung kipan kittai ti thu aki he kit tan, Europe gam pumpi a buai bak in, khawvel

pumpi a buai pan kit tau ti thu hiat kit ahi tai. Banggual thil ahung tung diam? tile hiatthei ei ta puai. Khawvel gam hi muanna gam ei ta puai ti hiat thei atai. Noah damlai akhanle, tuisang let ding kha a taksang puau in, lungmuang tak in, a um un, a neu in a dawn un, a kicheng un, a kichensak ui, ati gual khan, hilehle, Pathian thutep a chung ua a hung tun khan, tui ah aleng ua a thi suak ma siau kha bang ahi ti ahepuau hi. a ti ahi. (Gen. 6,7:)

Chuleh, nungak thiangtho sawm (10) mo neipa dawn ding ah ki singsate haw khale, a thaumei uh akeng chiat un, a thaumei tui bei pangate kha, kawtkhak akiu un hilehle, nang uh kua la hui em? ka he kha puai, ti'n kawt ahawn piak nuam ta puai. ("The oil is holy Spirit" Zekaria 4:6, Isai 61:1, Rom 8:9). Khawvel hi muanna gam ei ta puan, gingtute a ding in, khawvel leh a sung ah thil um zosia hi mangthai sik sek ding ahi. Ziaziakchun, Pauli'n "zia khawvel dan gual in um ki unla , Pathian dawigual apha leh pomtak leh a bukim chu la hiattheina ding un, la lungthim uh siamthak ah um in, hung danglam zaw tau in" (Rom 12:2) a ti hun kha ahi tai, a diak in thagau mite a ding in. Pathian in a thu malsawm taken.

-----

## “DIKTAKNA PHATCHUAM DAN”

TEXT : Psalms 92:12-15, 37:25-26

*By: Pro.Pastor St.Lianboi  
Leimakhong P.Gamhawi*

**Thumapui** :Thupidiktakkiti hi “Dikna” tin he maihituu, ‘Midiktak’ ahiloleh, ‘Midik’ haw hina leh phatchuamna lam gen hituu. Diktaknakiti hi Pathian mi hina khat ahi. Mihiam a ding ah vang midik khat ahiloleh, mithutak hiding kiti vang thil haksa khat chu ahi. Ahinlah, zawlel ding vang chu ahi diak puai. Tulai mi a ding ah vang, midiktak leh thutak nei hi mi ngawl in akilangzawn ahi. Himaleh, midikte/mi thudikte chu, ngawl in kilangmaleh, aga ahung tun phat leh vang adik tat na haw chu miching tin akilang kit sek hi.

Diktatlona,thudiklona, kiti haw hi tulai mi haw ding ah, hausatnadiamatchak thil khat ahivang in, aga ahun law phat ulehkuamatuitak leh vatak ah ane a um puau vin kuaman le a awtcha thei puau hi, ziaqual a chun, thagau lam ale atawpna chu, aw chak thei ahi puan, diktat naga’n vang taksa leh thagau in hinna leh kipakna’neilamtuak hi. Lalpa lopina changtahren,

### A. DIKTATNA THU BIBLE EI KAWK MU :

1. Ka naupang laiikipat ka tektiang in, midik, Pathian in alim sak lo ka he kha pua, a chate le khutdaw ka mu kha puai. (Ps. 37:25)
2. Lalpa chunmidiktean zing a, a konauangaitha sek hi. (Ps. 34:15)

3. Migiloteki chu, tanbawthintin, midikteki chu chawihawi hi zing ina. (Ps. 75:10)
4. Migilo chu gawt lo in um puan tin, midikte chu hukdaw in um innau. (Prov. 11:21)
5. Midik chung in siatna tung puan tin, himaleh, migilo chu thil phalo in bawminna. (Prov. 12:21)
6. Midikte chu thaumei gual in avakua, migilote chu khua thim gual ahiu. (Prov. 13:9)

Suapite haw midiktat leh tak lo thu ah I Bible in eikawk mu te hi ngaitua chiat hitiu.

#### **B. A DIKTAT LO HAW :**

1. Israel te lak ah, diktatnaleh khawtuanatea um puai tin, Bible in thiam maw a chan hi. (Hosea 4:1)
2. Israelte, diktatnaumlo ziak ah, Assyria ten gal hing in akai mang tau hi. zia gual a chun, diktatna, ineilo tak leh, thagau lam ale, gitlona suak ichannaahin, taksa ale, a tawpna, gaphalotu chu ihimai hi. (2. Kings 17). Sung hi, sim hitiu.
3. Juda Iskariotdiktatnaaneilo ziak in, ataksa leh a thagau ani in amangthai gel gel in ahi, ei uh le, diktatna I neilo uh le zia gual din mun ichan thei uh ahi. Taksa leh thagau ah, imanthailonadiu in diktatnanei chiat ding hi, Lalpa'n eiphut ahi.

#### **C. BIBLE A KIMU MIDIKTATTE APAT NGAITUAI TIU :**

1. **NOAH** :Midiktak, ama khang ah demna bei ahi gual in, eihawle Pathian mitmu leh mihing mitmu a, Noah gual I chan theina ding un diktatnaapawi maw hi tihemil puai tiu. (Gen. 6:9)

Ama hinna :

- (a). Leisiat ah, midiktat a umlolai tak ah, midik tat pa ahi.
- (b). Midiktat mi ahi ziak in, Pathian in thil guk/thuguk a gen piak mi khat ahi.
- (c). A kuang sui chu, midiktat mi ahi ziak in, tui in pualumlet maleh bangma atipuan, asia puai, azi, achate, amote leh a ganchasia le hukdawahitau. (Gen.8:18,19)
- (d). Midiktat mi ahi ziak in, Pathian in amaichamsiamte Pathian in a san piak in chuleh, van nuai/khawvel ama thuneina ahung hi tai. (Gen. 8:20, 9:1-3)

2. Job ngei khale Pathian a ding ah diktatna nei mi ahi ziak in, adamlona chung in, a zitilsiatna leh thepthak ah a um puan, achate, anei a go zosia bei maleh, Pathian in aneimasak sang ah pha zaw leh hawizaw tam zaw amalsawm hi, diktatna kiti hi manthaina leh vaichatna hilo in, hausatna tiang leh hausatna dik ahi zawi.

#### **D. DIKTATNA HI HAUSATNA AHI**

1. Khawvel ah company liantak haw leh minthang tak tak haw hi mihawn ataksan ziak un a thilsiamhawu a chawk piak uleh, aban ban ah, ahung hausa tiattiat un ahi. Mihawn ataksannau leh a thil siam a chawk piak nau ziak

ah chu a thilsiam hawu diktatna/titaktak a bawl ziaak uh ahi.

Diktatna neilo ah hausa haw khu, asawtpuan, diktatna nei pum ah hung hausa haw chu, Pathian leh mipi lung damna ahin, a to in a sawt sek hi. ziaqual ma chun, diktatna nei tak ah hausa haw hi ahau ahiu.

2. Japan gam hi agam uh 80% hi matthei lo gam ahi, ahin khawvel ah economy hawina lam ah a thum channa ahikit ui. Japan tehin mi gam apat (Raw Material) apua lut un, zia chu a siamhawi un (Manufacture) a bawl un gamdang ah ale zawk kit un, diktatna nei tak ah a bawl ziaak un, hausatnan a mang ui.

**ACHAINA** :Joshep hi kum 20 sung patep in ala um in, ahindiktatna nei zing pum in a um zing hi. ziaziakchun, Egypt gam a vaihawm na sang pen in a hung pang hi. (Luke 16:10) naagen gual in Tawmcha chungaginum tak chu, tamtak chung ale a gin um hi, a ti gual in, Joshephinkhuahinleaaguitung hi. (Prov. 16:20) na'n, migin um chun malzawlnadawnginaati gual in, diktatna nei zosiantaksa leh thagau ah phatchuam nei chiat ding ihu. Lalpa'n a thu ei malsawm taken.

-----

**PAUCHAPNA HETDINGTE**

1. RCG Special Assembly date:13/Feb/2021 S.Kanan vangkhua'n um ding hi bangkim fel takah mat ahithe na dinginle, thubuai labuai ti umlo ah, bandh tite le umlo ah, bangkim ah Pathian mapuina dawnga Assembly alawtin thei na dingin.
  2. March 2021 phat le RCG pawlpi Annual Assembly cum election um dinga hin, bialtin leh kochuam tin a pat member te fel takin i chia kim ua, RCG Lamkai ding te le Pa fel, Nufel Tangval Nungak pha pha Pathian mitak te teldaw ahi thei na ding he zing hitiu.
  3. Rev.Liante'n further study M.Th zil dingah ala kidawtna phalpiak ala hi dungjui in 2020 kum a khan Covid-19 Corona virus ziakin amun a chiathei lo maleu online class hun la to in, tuhin 2nd February 2021 le a collage mun zuan ding in train ticket te lak zaw ahita, aman le azil guatna munte damtak in ava zawt tungah kipak tak in hun zo ah dam ah inlam ahun zawt kit thei na ding in he zing hitiu.
  4. Tukum 2021 kum ahin Sunday school phatak cha'n akochuam a kochuam in zil ahitheina dingin.
  5. Kum 2021 sungah bangkim ah Taksa leh Thagau ah kituakna leh machalna lam, pitinna lam ma naw zel thei dingua I hukdamnau na thupi mitin in i semdaw chiat thei na ding un.
-



## H I A T S A K N A

Zion Thusuak hi kum khat ah lakman Rs, 100/- bep ahin, apia nailo ten hun piak gawleu chun kipak um ina.

Kuataw bang mimal sawm ah khat hi henlang Zion thusuak subscription fees hitale gal a pat Bank ah hun thun nuam ten anuai ah Bank min leh A/C Number ahin hun thawt leu chun kipak um ina.

Account Name: **Revival Church of God**

Account No. **11343704608**

Bank name: **State bank of India,**

Branch: **Churachandpur Branch.**

IFSC: **SBIN0006182**

Branch code: **6182**

-----

## ZION THUSUAK

### PATRON MEMBER

1. Pu Thangboi, Kohima
2. Nu Niangneu, HQ Veng
3. Nu Lily, T.Munjang
4. Nu Samboi Vanghoiphai

Patron members kum 3 (thum) 2020 apat Rs 1,000/- hita ahi.

*-Editor Zion Thusuak*

### Collector/Magazine Agent

- |                         |              |
|-------------------------|--------------|
| 1. Tv. Joel             | Hilltown     |
| 2. Tv. Lawmthang        | T. Munjang   |
| 3. Pa Pauelim           | Kangvai      |
| 4. Upa Tongjang         | Imphal       |
| 5. Nk. Jangneikim       | Nakhujang    |
| 6. Upa Manglun          | S. Elimphai  |
| 7. Upa S. Haupu         | S. Kanan     |
| 8. Pa Mangminlun        | Gawtangkawt  |
| 9. Nk. Hatshi           | Jordanphai   |
| 10. Tv. Hauginlian      | Bewlahlane   |
| 11. Nk. Paknu           | Mualkon      |
| 12. Tv. Khaimuan        | Mantripukhri |
| 13. Pa Lenghau Phaltual | Vanghoiphai  |
-





## BOOK POST

70.

RNI Regd. No. 34293/80

.....  
.....

Stamp

*If undelivered please return to:  
The Editor*

**ZION THUSUAK**

RCG Office Hilltown, PO Box – 91

Churachandpur – 795128, Manipur

Email: [Khupkamvaiphei@gmail.com](mailto:Khupkamvaiphei@gmail.com)

[www.rcg.org.in](http://www.rcg.org.in)

contact: +91 9612652209